

# Un gran Arubiano, un homber cu vision cultural y un gran educador a bai laga nos

Frère Alexius, fundador di 'De Trupialen'



**ORANJESTAD-** Diasabra 6 di maart 2004 Rien Preyde, conoci pa nos na Aruba como **FRÈRE ALEXIUS**, fundador di e grupo hubenil "*De Trupialen*" a fayece na Roermond, Hulanda. E noticia aki a cai duro cerca tur hende cu a conoce frère Alexius. Mas cu tur pasobra ta dificil pa describi cuanto e persona aki a nifica pa formacion personal y bida di asina hopi hende. Mescos ta dificil pa describi cuanto su contribucion tabata na cultura y

arte popular di Aruba. Aunke naci na Hulanda y educa den un cultura totalmente diferente cu di Aruba, cu un sistema religioso estricto y den un tempo colonial, frère Alexius a scohe pa deshaci di e bareranan psicologico y social aki, a cambia su cuadro di referencia hulandes y a converti su mes den un estimulo grandi pa desaroyo di musica, canto y teatro popular di Aruba.

**ARUBA DUSHI TERA**  
Den un tempo cu riba 'Dia

di La Reina' na e aubade pa dignitarionan local y Hulandes tabata por a canta solamente canticanan na hulandes, frère Alexius a tribi di kibra cu e tradicion aki y a laga su muchanan canta canticanan na Papiamentu. Entre nan e '*Aruba Dushi Tera*'. Hopi prome cu e cantica aki a bira nos himno nacional. E prome grupo pa canta y graba '*Aruba Dushi Tera*' di e compositor nan Rufo Wever

y Padu Lampe tabata "*De Trupialen*" bou guia di nan amigo frère Alexius. Frère Alexius y "*De Trupialen*" a canta y toca masha hopi cantica cu awe ta joyanan di nos repertorio musical. Canticanan di entre otro e famoso compositor Hubert Booi. Tabata frère su curashi pa trece cambio den tradicionnan cultural colonial cu a atrea hopi hende pa traha y sostene e trabou di frère Alexius. Esaki den un tempo cu tradicionnan y reglanan tabata fuerte y aceptacion di nos propio idioma, musica y nos propio talentonan Arubiano tabata masha limita. E tabata e tempo cu Aruba tabata busca tambe su propio identidad como pais. E tempo di e lucha di Status Aparte den añanan cincuenta.

## TALENTO ARUBIANO

Un otro herencia cu frère Alexius ta laga atras ta e creacion di generacionnan largo di talento Arubiano riba terenonan di musica, canto y teatro. Ta masha hopi di nos musiconan, cantantenan y actornan a siña toca, canta y actua den "*De Trupialen*" bou guia incansabel di frère Alexius. Ken cu a lanta den añanan 50 y 60 no ta corda e gran obra di teatro "*Perla di Caribe*" cu e famoso cantica "*Ora Ubou*". Ken no ta corda e tantísimo comedianan cu cual frère Alexius y "*De Trupialen*" tabata gira rond di Aruba cu actornan cu despues a sigui usa

nan talento di actua den otro gruponan teatral. Comedianan manera "*Scapin*", "*Buchi*" y "*Tenten Berom*". Hopi di e musiconan conoci na Aruba a siña toca y a desaroya nan talento cerca frère Alexius y "*De Trupialen*". Tin un cantidad grandi di cantantenan cu a siña canta y desaroya nan talento cerca frère Alexius y "*De Trupialen*". E generacionnan di hobennan talentoso cu a lanta den "*De Trupialen*" ta djies un ehempel mas di e trabou inovado y educativo di frère Alexius y e pleno confiansa cu famianan Arubiano tabata tin den dje.

**KERE DEN NOS HENDENAN Y CREA OPORTUNIDAD PA NAN CRECE**

Pero e loke mas lo corda frère Alexius pe ta cu den un tempo cu muchanan no tabata tin mucho mas pa haci cu hunga bala, core den mondi y hunga kiniki pa pasa tempo, frère Alexius a crea un ambiente agradabel, un cas, pa stimula desaroyo personal. Esaki a forma ciudadanonan cu respet pa otro y disciplina den tur loke nan haci; hende cu amor pa nan prohimo y nan pais, y curashi pa lanta para y tuma responsabilidad y iniciativa. Awe nos ta wak e hendenan aki den tur ramo di nos comunidad. Ta un hende cu un stimacion incondicional pa sernan humano, cu un respet y aprecio pa valornan di otro, so por a haci esaki. Un hende cu un vision asina optimista di nòs comunidad, hopi prome cu otronan por a hasta imagina nan mes esaki. Un hende cu a sa di crea un ambiente den cua hobennan por a forma nan mes, liber di precion y prehuicio. Liber pa crea cosnan bunita pa nos tur. Esaki tabata e gran musico y educador Arubiano frère Alexius. Frère, sosega na paz. Nos ta agradecido pa loke Abo a haci pa nos! Nos sa cu loke mas Abo lo kier awor aki, ta pa nos sigui riba e caminda cu Abo a indica! Pa mescos cu Abo a kere den nos, nos kere den nos hobennan!

## ANLY Printing N.V.

ENGELANDSTRAAT #2  
TEL. 5836732 / FAX: 5836732

# 18 di Maart Himno y Bandera

Anty Printing N.V. conhuntamente cu **WEMA Home & Hardware**  
tin articulonnan pa Celebracion di Himno y Bandera na tur sucursal di **WEMA** - San Nicolas, Santa Cruz, Ponton y Boulevard.

- \* T-Shirt pa Grandi y Chiquito
- \* Bandera Grandi pa Gas y Chiquito pa Auto
- \* Potchi borda




